


國學基
本叢書

白石道人詩集

集外詩 附錄
附錄補遺





書叢本基學國

集詩人道石白

遺補錄附 錄附 詩外集

撰 夔 姜

行發館書印務商

中華民國二十六年五月初版

(92184.3)

國學基
本叢書

白石道人詩集

集外詩附錄
附錄補遺

一册

每册實價國幣捌分

外埠酌加運費匯費

撰者 姜

夔

發行人

王雲五

上海河南路

印刷所

商務印書館

上海河南路

發行所

商務印書館

上海及各埠

四一六四一平

徐

(本書校對者楊靜齋)

四庫全書總目提要

白石詩集一卷附詩說一卷

編修汪如藻家藏本

宋姜夔撰。夔有絳帖平已著錄。羅大經鶴林玉露稱夔學詩於蕭炳。而卷首有夔自序二篇。其一篇稱三薰三沐。師黃太史氏。居數年。一語噤不敢吐。始大悟學卽病。不若無所學者之爲得。其一篇稱作詩求與古人合。不如求與古人異。求與古人異。不如不求與古人合。而不能不合。不求與古人異。而不能不異。其學蓋以精思獨造爲宗。故序中又述千巖誠齋石湖咸以爲與己合。而已不欲與合。其自命亦不凡矣。今觀其詩。運思精密。而風格高秀。誠有拔於宋人之外者。傲視諸家。有以也。宋史藝文志載夔白石叢臺十卷。陳振孫書錄解題載白石道人集三卷。今止一卷。殆非完本。考武林舊事載夔詩四首。咸淳臨安志載夔詩三首。研北雜志亦載夔詩一首。皆此本所無。知在所佚諸卷之內矣。夔又有詩說一卷。僅二十七則。不能自成卷帙。舊附刻詞集之首。然既有詩集。則附之詞集爲不倫。今移附此集之末。俾從其類。觀其所論。亦可以見夔於斯事所得深也。

南宋番陽姜堯章。以布衣擅能詩聲。所爲樂章。更妙絕一世。今所傳白石道人詩集一卷。蓋本臨安陸親坊陳起所刊羣賢小集。更竄入麗水姜特立梅山藁中詩。幾於邾婁之無辨。樂章自黃叔暘所輯花庵絕妙詞選二十餘闕外。流傳者寡。雖以秀水朱竹垞太史之揆討。亦未見其全。疑白石道人歌曲六卷。著錄於貴與馬氏者。久爲廣陵散矣。近雲間樓廉使敬思。購得元陶南村手鈔。則六卷完好無恙。若有神物護持者。余友符戶部葑林。從都下寄示。因并詩集亟爲開雕。公之同好。詩集稍分各體。釐定去竄入之作。歌曲第二卷第六卷。爲數寥寥。因合爲四卷。其中自製曲俱有譜。旁注雖未析其節奏。悉依元本鈎摹。以俟知音識曲者論定云爾。乾隆癸亥冬十月既望。江都陸鍾輝書。

重刻白石道人詩詞序

臣里雅譚文字昵於陶詠。寓公傳作名氏繡於湖山。則有番陽布衣。松陵遊客。蕭家詩派。詫白石之有雙。宋代詞流。除玉田而無偶。然而最工令慢。或揜詩名。絕妙歌行。分傳別集。是以史臣著錄。但標叢稿之名。嘉泰初編。僅有歌曲之刻。流傳將七百載。剗剗且十餘家。縱復競握靈蛇。未必盡窺全豹。兵塵況涉。板槧亦灰。偶蕢叢殘。匙離哀盍。吁其惜矣。邁孫許丈。熱腸媚古。目湮散爲可傷。明眼求書。斬蒼粹而後快。以爲君臣南渡。存於客子文詞。士女西湖。飲彼勝流膏潤。矧如白石翁者。卽論人品。有晉宋閒風。別擅書名。似申韓家法。幸餘述造。大思畸零。於是羅百琲之散珠。泮兩珪爲合璧。梨鑿竝槩。楮帙同函。集長短句而傳。及拍文彙。五七言而增。以詩說。旣評跋倡誦之旁采。復遺聞軼事之兼蒐。斯則南村手鈔以還。無茲盛舉。祠堂善本而外。侈爲寶書者也。嗟乎。翰墨有靈。煙霜多感。酌馬騰之酒。墓門沒於花田。度石函之橋。寓亭荒於水磨。謝爾費將油素。怵傳授簡之人。更誰贈得小紅。解唱吹簫之我。光緒甲申天中節。錢唐張預序於東城之量月樓。

綴言

宋史藝文志載姜夔白石叢書十卷。陳振孫書錄解題載白石道人集三卷。今所傳詩集非足本也。王晦叔炎有和堯章九日貨菊詩二首。陳唐卿造有次堯章寄贈詩原韻五首。又次堯章餞南卿韻二首。集中無此詩。亦未著於目錄。恐此外佚者尙多。從此遂成廣陵散矣。

白石道人歌曲。無論宋嘉泰本不可得見。卽貴與馬氏本亦少流傳。就所知者。常熟汲古閣本。江都陸鍾輝本。華亭張奕樞本。歙縣洪正治本。華亭姜氏祠堂本。揚州知足知不足齋本。陸版後入江鶴亭家。再歸阮文達。道光癸卯燬於火。張版入南蕩張氏書三味樓。後亦不存。陸本。洪本。祠堂本。皆詩詞合刻。餘則有詞無詩。近又有閩中倪耘劬本。臨桂王鵬運本。至於斟酌精密。當推陸本爲最。茲據陸本重刊。間有與別本互異者。附刊本字之下。以墨圍隔之。

南匯張嘯山徵君文虎著舒菴室餘筆。載白石道人歌曲攷證。謂陸鍾輝本所刻譜式。以意竄改。每失故步。不如張奕樞所刻之善。不知陸張兩刻。皆從樓敬思所藏陶南邨手鈔本錄出。陸本刻於乾隆癸亥。張本刻於己巳。相去才數年。中間或以鈔胥致譌。兩本對勘。似陸刻猶勝於張嘯山。但據張本訂正。指陸爲譌。其實陸本未嘗譌也。安得嘉泰本一正是之。

白石道人歌曲第四卷後。有嘉泰壬辰至日。刻於東巖之讀書堂。雲間錢希武十九字。似陶南邨從

宋本錄存者。按宋寧宗嘉泰元年辛酉。至乙丑改元開禧。此繫壬辰。當是壬戌之誤。集外詩尙有嘉泰壬戌訪全老之作。希武豈卽於是年爲之刻集邪。俟考。

宋之善言樂者。沈括、姜夔兩人而已。其和峴、胡瑗、阮逸、李照諸人。紛如聚訟。汔無心得。括夔所論。皆能推俗樂之條理。以上求合乎雅樂。故立論不同私逞。惜括議已不傳。僅於筆談中略見之。夔議原本經術。卓然可信。當時竟不見用。固無能知其窺窬者。因錄大樂議、琴瑟考、古圖說、於逸事之後。毋使孤詣絕學終於湮沒云。

吳君特文英。夢窗乙藁有淒涼犯一詞。與白石集中題序詞字無少異者。疑當日兩公交厚。彼此唱酬。互竄入集。抑後人哀輯之譌。蓋君特蹤跡未嘗一涉合肥。白石則屢至而屢見於詞。此詞爲白石之作無疑。

張宗瑞輯所作白石小傳。徧索不得。阮文達所刻詒經精舍文集中。撰姜夔傳者六人。茲錄一首。以補舊史之闕。白石葬杭之西馬塍。或云葬水磨頭。近亦無能確指其處。欲仿花山弔柳會不可得也。光緒甲申夏四月。仁和許增邁孫識。

白石道人小象



白石道人詩集

小象

康郎之山彭蠡之水靈秀所鍾
篤生逸士上書論樂天子色喜
尚使雷音一夔足矣人嫉其能
時止鼻止去所隱焉同彼角里
簪剏既云有大才而無貴仕吾
於白石亦曰如是

何起瀛贊

徐惟琨錄

白石道人詩集自敘

詩本無體。三百篇皆天籟自鳴。下逮黃初。迄於今人。異轍故所出亦異。或者弗省。遂艷其各有體也。近過梁谿。見尤延之先生。問余詩自誰氏。余對以異時泛閱衆作。已而病其駁如也。三薰三沐。師黃太史氏。居數年。一語噤不敢吐。始大悟學卽病。顧不若無所學之爲得。雖黃詩亦偃然高閣矣。先生因爲余言。近世人士。喜宗江西。溫潤有如范致能者乎。痛快有如楊廷秀者乎。高古如蕭東夫。俊逸如陸務觀。是皆自出機軸。竄有可觀者。又奚以江西爲。余曰。誠齋之說政爾。昔聞其歷數作者。亦無出諸公右。特不肯自屈一指耳。雖然。諸公之作。殆方圓曲直之不相似。則其所許可。亦可知矣。余識千巖於瀟湘之上。東來識誠齋。石湖。嘗試論茲事。而諸公咸謂其與我合也。豈見其合者。而遺其不合者耶。抑不合乃可○祠堂本以爲合耶。抑亦欲俎豆余於作者之間。而姑謂其合耶。不然。何其合者衆也。余又自喑曰。余之詩。余之詩耳。窮居而野處。用是陶寫寂寞。則可。必欲其步武作者。以鈞能詩聲。不惟不可。亦不敢。

自敘二

作者求與古人合。不若求與古人異。求與古人異。不若○祠堂本求與古人合。而不能不合。不求與古人異。而不能不異。彼惟有見乎詩也。故向也求與古人合。今也求與古人異。及其無見乎詩。已故不求與古人合。而不能不合。不求與古人異。而不能不異。其來如風。其止如雨。如印印泥。如水在器。其蘇子所謂不能

不爲者乎。余之詩。蓋未能進乎此也。未進乎此。則不當自附於作者之列。悉取舊作。秉畀炎火。俟其庶幾。於不能不爲而後錄之。或曰不可。物以蛻而化。不以蛻而累。以其有蛻。是以有化。君於詩將化矣。其可以舊作自爲累乎。姑存之以俟他日。

白石道人小傳

嚴杰

姜夔字堯章。系出九真。唐諫議大夫同中書門下平章事公輔之裔。八世祖泮。任饒州教授。卽家於鄱陽。父噩。紹興庚午擢進士第。以新喻丞知漢陽縣。夔從父宦遊。流落古沔。恬澹寡欲。不樂時趨。氣貌若不勝衣。工書法。箸續書譜。以繼孫過庭。頗造翰墨闡域。詩律高秀。詞亦精深華妙。尤嫻於音律。初學詩於蕭颯。攜至茗上。遂以兄子妻之。時張燾、楊萬里皆折節與交。而樓鑰、范成大更相友善。成大曾以青衣小紅贈之。紹興中。秦檜當國。隱箬坑之丁山。參政張燾累薦不起。高宗賜宸翰。建御書閣。以儲夔。嘗患樂典久墜。欲正頌臺樂律。寧宗慶元丁巳。上書論雅樂。并進大樂議。詔付有司收掌。時有嫉其能者。以議不合而罷。己未。作鏡歌鼓吹曲一十四章。上於尙書省。書奏。詔付太常。周密以爲言辭峻裂。意度高遠。有超越驪騮之意。非虛譽也。居與白石洞天爲鄰。因號白石道人。時往來西湖。館水磨方氏。後以疾卒。葬西馬塍。故蘇洞挽之云。幸是小紅方嫁了。不然唬損馬塍花。箸有琴瑟考古圖一卷。絳帖平二十卷。禊帖偏旁考。集古印譜。張循王遺事。白石道人叢藁十卷。詩說一卷。歌曲四卷。子二瓊。太廟齋郎。瑛。嘉禾郡僉判。

白石道人詩集目錄

卷上

五言古詩

以長歌意無極好爲老夫聽爲韻奉別沔鄂親友

赤松圖

虞美人草

華藏寺雲海亭望具區

夏日寄朴翁朴翁時在靈隱

春日書懷四首

篋篋引

待千巖

古樂府

雪中訪石湖 范成大和詩附

賦千巖曲水

白石道人詩集

目錄

李陵臺

呈徐通仲兼簡仲錫通仲與誠齋爲鄉人近來赴調而誠齋去國又通仲久與千巖有茗雪之約而未至余挽通仲欲與同歸千巖故末章及之

和轉庵丹桂韻

昔遊詩 潘檉韓沈書後詩附

七言古詩

送王孟玉歸山陰

烏夜啼

余居苕溪上與白石洞天爲鄰潘德久字予曰白石道人且以詩見畀其辭曰人間官爵似撐痛采到枯松亦大夫白石道人新拜號斷無繳駁任稱呼予以長句報貺

丁巳七月望湖上書事

送陳敬甫

生雲軒

送項平甫倅池陽

書乞米帖後

契丹歌

禽言如曰哥哥

次韻誠齋送僕往見石湖長句

楊萬里原作附

卷下

五言律詩

題華亭錢參園池

同朴翁登臥龍山

坐上和約齋

出北關

答沈器之二首

悼石湖三首

七言律詩

送朝天續集歸誠齋時在金陵

寄上張參政

京口留別張思順

白石道人詩集 目錄

次朴翁遊蘭亭韻

次韻胡仲方因楊伯子見寄

賀張肖翁參政

陳君玉以小集見歸用余還誠齋朝天續集韻作七字夔報貺

寄田郎

送王德和提舉淮東

寄時甫

送李萬頃

次韻千巖雜謠

寄上鄭郎中

送左真州還長沙

乍涼寄朴翁

張平甫哀挽

五言絕句

同潘德久作明妃詩

東堂聯句

與和甫時甫分題畫卷變得剡溪圖

六言絕句

金神夜獵圖二首

次韻鴛鴦梅二首

馬上值牧兒

七言絕句

過湘陰寄千巖

雁圖

除夜自石湖歸苕溪

臨安旅邸答蘇虞叟

姑蘇懷古

次韻德久

次石湖書扇韻

竹友爲徐南卿作

白石道人詩集 目錄

壽朴翁

湖上寓居雜咏

平甫見招不欲往

三高祠

過桐廬

登烏石寺觀張魏公劉安成岳武穆留題劉云侍兒意真奉命題記

過垂虹

訪費山人

牛渚

武康丞宅同朴翁詠牽牛

朴公悼牽牛甚奇余亦作

過德清

項里

雪中六解

越中士女春遊

送范仲訥往合肥三首

下菰城

平甫放三十二○祠堂
本作六鷗於吳松余不及與盟

蕭山

戊午春帖子

偶題

陳日華侍兒讀書

女郎山

釣雪亭

綠萼梅

次韻武伯

觀燈口號十首

陪張平甫遊禹廟

寄俞子二首

集外詩

燈詞

春詞

同朴翁過淨林廣福院

嘉泰壬戌上元日訪全老於淨林廣福院觀沈傳師碑隆茂宗畫贈詩

龍井

自題畫像

句

白石道人詩集卷上

宋 番陽姜夔 堯章著

五言古詩

以長歌意無極。好爲老夫聽爲韻。奉別沔鄂親友。

滔滔沔鄂留。有硯三宿桑。持鉢了白日。事賤丸蝓蟻。舍○祠堂本
作念。當去石友。煙席淩江湘。爲君試歌商。歌短

意則長。

佳人魯山下。謂楊大昌
正之。日弄清漢波。促絃調寶瑟。哀思感人多。咬哇秦缶擊。冷落郢客歌。知音良不易。如此

粲者何。

英英白龍孫。鄭仁舉
次畢。眉目古人氣。拮据營數椽。下簾草生砌。文章作選庭。功用見造次。無庸垂罄嗟。遺安

鹿門意。

詩人辛國士。辛泌克
清。句法似阿駒。別墅滄浪曲。綠陰禽鳥呼。頗參金粟眼。漸造文字無。兒輩例學語。屋壁

祝蒲。○舊鈔本
作呼。盧。

山陰千載人。揮灑照八極。只今定武刻。猶帶龍虎筆。單侯出機杼。單煒炳
文。豈是劍舞得。餘波入竹石。絕歎

咄咄逼。

異時之罨君，在涅守白頭。黃鐘欠牛鐸，淋漓弔遺稿。有子殊可人，蔡道堅，字子武伯。特未見此老。客來請論文，但道曲歌好。

中郎遊千霜，曲高復誰爲。龐翁趣無絃，鄭伯功斲鼻。春風桃花溪，寒潦繞蒼翠。何當從兩君，放浪計幽事。宦達羞故妻，貧賤厭邱嫂。上書雲雨迴，還舍筇屨老。江阜鉅帶經，決計恨不早。十無五段皮，沒世抱枯槁。伐木響虛牝，吾願友褐夫。九關呀虎豹，何時內高袂。黃鶴渺雲樹，鸚鵡澹煙蕪。倚杖得清賞，洗心觀本初。孤鴻度關山，風霜催翅翎。影低白雲暮，哀噉那忍聽。士生有如此，儲粟不滿瓶。著書窮愁濱，可續離騷經。

亦松圖

山車降準公，未語心已解。按劍堂下人，成事汝應退。非無帶礪約，政爾有恩害。平生三寸舌，松間漱寒瀨。

虞美人草

夜闌浩歌起，玉帳生悲風。江東可千里，棄妾蓬蒿中。化石那解語，作草猶可舞。陌上望騅來，翻愁不相顧。

華藏寺雲海亭望具區

寺爲張循王功德院。

茫茫復茫茫，中有山蒼蒼。大哉夫差國，坐占天一方。夫差醉蓮宮，巨浪搖不醒。越師何從來，奪我玉萬頃。年年亭上秋，一笛千古愁。誰能知許事，飛下雙白鷗。

夏日寄朴翁，朴翁時在靈隱。

風吹松樹枝，懷我松間友。雲從北山來，令我屢回首。山雲夜夜起，山雨侵人衣。遙知竹窗裏，自吟新雨詩。

春日書懷四首

九真何蒼蒼。乃在清漢尾。衡茅依草木。念遠獨伯姊。春來衆芳滋。春去衆芳萎。兄弟各天涯。啼鴉見料理。漢江出巨魚。風雷入驅使。安得挾我輶。西征二千里。

春雲驛路暗。遊子渺歸程。永懷故山下。風雨悲柏庭。翁仲不解語。幽鳥時時鳴。人家插垂柳。客裏又清明。垂楊大別寺。春草郎官湖。家巷有石友。合并不待呼。瘦藤倚花樹。花片藉玉壺。老鄭譚絕妙。辛楊句敷腴。平生子姚子。貌古心甚儒。時邀野僧語。間與琴工俱。酒闌興未了。左轉城南隅。大江圍楚碧。煙水入玄虛。留落不自恨。惟嗟故人疏。一月三見夢。夢中相與娛。日日潮風起。悵望武昌魚。

武昌十萬家。落日紫煙低。亭亭頭陀塔。高處白鳥棲。白鳥忽飛去。春山空四圍。南樓有佳人。再召且再辭。閉門課文事。○舊鈔本作史。櫻物深天機。斯人不可致。白鳥會來歸。

篴篴引

篴篴且勿彈。老夫○舊鈔本作大。不可聽。河邊風浪起。亦作篴篴聲。古人抱恨死。今人抱恨生。南鄰賣妻者。秋夜難爲情。長安買歌舞。半是良家婦。主人雖愛憐。賤妾那久住。緣貧來賣身。不緣觸夫怒。日日登高樓。悵望宮南樹。

待千巖

褰裳望洞庭。眼過天一角。初別未甚愁。別久今始覺。作箋非無筆。寒雁不肯落。蘆花待挈音。○舊鈔本作舟。怪底

北風惡。

若人金石心。試命○舊鈔本作問洞庭浪。傳聞下巴陵。漉酒喜無恙。我行丹楓林。屢騁白蘋望。烏鵲不可噉。論功

當坐上。

古樂府

裁衣贈所歡。曲領再三安。歡出無人試。閨中自著看。甚欲逐郎行。畏人笑無媒。日日東風起。西家桃李開。令我歌一曲。曲終郎見留。萬一不當意。翻作平生羞。

雪中訪石湖

雪矸如玉城。偏師敢輕犯。黃蘆陣野鷺。我自將十萬。三載○祠堂本作戰渠未降。北面石湖范。先生竊越手。定自一笑粲。

次韻堯章雪中見贈

范成大致能

玉龍陣長空。皐比忽先犯。鱗甲塞天飛。戰退三百萬。當時訪戴舟。卻訪一寒范。新詩如美人。蓬壺愧三粲。

賦千巖曲水

紅雨灑溪流。下瀨仍小駐。魚隊獵殘香。故故作吞吐。老子把一盞。微風忽吹去。

李陵臺

李陵歸不得，高築望鄉臺。長安一萬里，鴻雁隔年回。望望雖不見，時時一上來。

呈徐通仲兼簡仲錫。通仲與誠齋爲鄉人，近來赴調，而誠齋去國。又通仲久與千巖有茗書之約，而未至。余挽通仲欲與同歸千巖，故末章及之。

斯文準乾坤，作者難屈指。我從李郭遊，知有徐孺子。春風橘洲前，白月太湖尾。懷哉○舊鈔本作我來無期，玉唾

炯在紙。去年識仲氏，何啻空谷喜。合并忽自天，顛倒見底裏。維君天下士，竹箭東南美。胡不在石渠，諸公當料理。千巖今林宗，泉石助風軌。示疾不下堂，有句高八米。此老筆硯交，誠齋古元禮。毫端灑秋露，去國詞愈偉。屬聞都門別，回首卽桑梓。獨憐茗溪上，垂楊俟行李。煙波肯尋盟，歸櫂爲君艤。

和轉庵丹桂韻

野人復何知，自謂山澤好。來裨奉常議，識筳鼓羽葆。誰憐老垂垂，卻入鬧浩浩。營巢猶是寓，學圃何不早。淮桂手所植，漢甕躬自抱。花開不忍出，花落不忍掃。佳客夜深來，清尊月中倒。一禪兩居士，更約踐幽討。昔遊詩

夔蚤歲孤貧，再走川陸。數年以來，始獲寧處。秋日無謂，追述舊遊，可喜可愕者，吟爲五字古句，時欲展閱，自省生平，不足以爲詩也。

洞庭八百里，玉盤盛水銀。長虹忽照影，大哉五色輪。我舟度其中，晃晃驚我神。朝發黃陵祠，暮至赤沙曲。

借問此何處。滄灣三十六。青蘆望不盡。明月耿如燭。灣灣無人家。只就蘆邊宿。

放舟龍陽縣。洞庭包五河。江。○沅。濱。湘。○舊鈔本作湖。大淘淘不得道。茫茫將奈何。篙師請小泊。石矸沈泥沙。是中

無岸。強指葦與莎。滯留三四晨。大浪山嵯峨。同舟總下淚。自謂餽鼃鼃。白水日以長。僅存青草芽。轉盼又

已沒。但見千頃波。此時羨白鳥。飛入青山阿。

九山其馬首。一一奔洞庭。小舟過其下。幸哉波浪平。大風忽怒起。我舟如葉輕。或升千丈坡。或落千丈坑。

回望九馬山。政與大浪爭。如飛鵝車礮。亂打睢陽城。又如白獅子。山下跳鬚鬢。須臾入別浦。萬死得一生。

始知茵席溼。盡覆杯中羹。擊鑿一作猱。

蕭蕭湘陰縣。寂寂黃陵祠。喬木蔭樓殿。畫壁半傾敝。蘆洲雨中澹。漁網煙外歸。重華不可見。但見江鷗飛。

假令無恨事。過此亦依依。

我乘五板船。將入沌河口。大江風浪起。夜黑不見手。同行子周子。渠膽大如斗。長竿插蘆席。船作野馬走。

不知何所詣。生死付之偶。忽聞入草聲。燈火亦稍有。杙船遂登岸。亟買野家酒。

天寒白馬渡。漢川縣界。落日山陽村。是時無霜雪。萬里風奔奔。外旃吹已透。內纊冰不溫。吹馬馬欲倒。吹笠

任飛翻。不見行路人。但見草木蕃。忽看野燒起。大燄燒乾坤。聲如震○舊鈔本作電。雷震。勢若江湖吞。虎豹走散

亂。麋鹿不足言。夜投野店宿。無壁亦無門。此行值三厄。幸得軀命存。明發見老姊。斗酒爲招魂。

揚舲下大江。日日風雨雲。留滯鼃背洲。十日不得發。岸冰一尺厚。刀劍觸舟楫。岸雪一丈深。屹如玉城

鈔本作成。

堞同舟二三士。頗壯不恐懼。蒙毳開○祠堂本作閉。

篷臥波裏任傾側。晨興視壘上。積雪何皎潔。欲上不

得梯。欲留岸頰裂。扳援始得上。幸有人見接。荒村兩三家。寒苦衣食缺。買豬祭波神。入市路已絕。如今得安坐。閒對妻兒說。

青草長沙境。洞庭渺相連。洞庭西北角。雲邊更無邊。後有白湖沌。渺莽里數千。豈惟大盜窟。神龍所盤旋。白湖辛巳歲。忽墮死蜿蜒。一鱗大如箕。一髻大如椽。白身青鬢鬣。兩角上捎天。半體臥沙上。半體猶沈淵。里正聞之官。官使吏致虔。作齋爲禳祓。觀者足闐闐。斂席覆其體。數里聞腥羶。一夕雷雨過。此物忽已遷。遺跡陷成川。中可行大船。是年虜亮至。送死江之壩。或云祖龍讖。詭異非偶然。近日山陽人。采菱不知還。望見三龍浮。目若電火然。見龍多見尾。少見四體全。一龍已爲異。三者亦罕傳。又因漁湖側。水中忽生煙。煙中一驢出。繞身步蹠蹠。俄隨霹靂去。欲語無由緣。我聞語此事。乘舟往觀焉。徑往枯葭浦。白鷺爭相先。湖有劉備廟。實司浩渺權。徘徊無所見。歸權月明前。

昔遊桃源山。先次白馬渡。

桃源縣界。

渡頭何清深。鴻鵠在高樹。白馬亦洞天。昔人有奇遇。洞門不可見。但聞

水聲怒。瞻彼羽人宅。乃乘方船渡。修廊夾五殿。重閣映千樹。規模象魏壯。四合綠陰護。山椒望五溪。壺頭入指顧。故宮在其北。屋瓦帶松霧。古杉晉時物。中空野人住。外圍四十尺。內可十客聚。我遊瞿仙館。壇上表遺步。卻下八疊坡。一亭衆妙具。兩山抱澄潭。老木枝榦互。瞻前秀而迴。坐久凜難駐。桃源獨不見。僻在宮南路。山行轉深邃。狙猿紛上下。石竇出微涓。令我意猶豫。昔聞漁舟子。水際見洞戶。今看去溪遠。定自

後人誤。惆悵卻歸來。此遊不得屢。於今二十年。歷歷經行處。

昔遊衡山下。看水入朱陵。半空掃積雪。萬萬玉花凝。或如生綃挂。或如薄霧橫。紛紛虎豹吼。往往蛟龍驚。人語不相聞。濺雹漂風纓。有魚綠峭壁。上上終不停。此中有神物。雷雨周八紘。

昔遊衡山上。未曉入幽谷。欲識所坐輿。橫板挂兩竹。狀如秋千垂。高下不傾覆。登山九千丈。中道多佛屋。一峰高一峰。峰峰秀林木。仰看同來客。木末見冠服。高臺石橋路。尋常雲所宿。下方雷雨時。此上自晴旭。紫蓋何突兀。萬里在一目。餘峰六七十。僅如翠浪蟲。北有嬾瓊巖。大石庇樵牧。下窺半厓花。杯盃琢紅玉。飛雲身畔遇。攪之盈掬。祝融最高絕。紫蓋不足錄。俯視同仰觀。蒼蒼萬形伏。惟餘岫嶠峰。南眺半空綠。髣髴認瀟湘。向嶽流屈曲。高處驚我魂。翻思宅平陸。其東有雷穴。靈異謹勿觸。雲來繇世界。雲去一峰獨。僧窗或留罇。雲入不可逐。絕頂橫石梁。仙人有遺躅。山多金光草。夜半如列燭。靈藥不可尋。吁嗟歸太速。濠梁四無山。坡陁互長野。吾披紫茸氈。縱飲面無赭。自矜意氣豪。敢騎雪中馬。行行逆風去。初亦略霑灑。疾風吹大片。忽若亂飄瓦。側身當其衝。絲絛袖中把。重圍萬箭急。馳突更叱咤。酒力不支吾。數里進一罈。燎茅烘溼衣。客有見留者。徘徊望神州。沈歎英雄寡。

既離湖口縣。未至落星灣。舟中兩三程。程程見廬山。廬山遮半天。五老雲爲冠。朝看金疊疊。暮看紫巖巖。瀑布在山半。髣髴認一斑。廬山忽不見。雲雨滿人間。

雪霽下揚子。閒望江上山。山山如白玉。日照金孱顏。是時江水淨。影落清鏡寒。潮催庾信老。雲送佛狸還。

萬古感心事。惆悵垂楊灣。

衡山爲真宮。道士飲我酒。共坐有何人。山中白衣叟。問叟家何在。近住山洞口。殷勤起見邀。徐步入林藪。雲深險徑黑。石亂湍水吼。尋源行漸遠。茅屋翦如帚。老烹茶味苦。野琢琴形醜。叟云司馬遷。學道此居久。屋東大磬石。碁畫今尙有。古木庇覆之。清泉石根走。因悲百年內。汲汲成白首。仙人固難值。隱者亦可偶。追惟恍如夢。欲畫無好手。

書昔遊詩後

潘 檉德久

我行半天下。未能到瀟湘。君詩如畫圖。歷歷記所嘗。起我遠遊興。其如鬢毛霜。何以舒此懷。轉軫彈清商。

又

韓 流仲止

平生未踏洞庭野。亦不曾登南嶽峰。因君譚舊遊。恍如常相從。江淮歷歷轉湘浦。裘馬意氣傳邊烽。吾嘗汎大江。只見匡廬松。乘風醉臥帆影底。高浪直濺嵐光濃。日暮泊船時。是夜方嚴冬。雪花壓船船背重。纜搖柁鼓聲如鐘。當年意淺語不到。無句可寫波濤春。君詩乃如許。景物不易供。盡歸一毫端。狀口飛龍。人間勝處貴著眼。雖有此興無由逢。錢唐山水亦自好。奈何薄宦難從容。南高北高一千丈。潮頭日夜鳴靈蹤。應有隱者爲識賞。青鞵布韉扶杖筇。君無詫彼我愧此。急還詩卷心徒慙。

七言古詩

送王孟玉歸山陰

淮南雪落雲繞戍。王郎鳴鞭獵狐兔。問君本是山陰人。何不扁舟剡溪去。人生樂事將無同。知君此心如太空。只今去踏龍尾道。也似寒江蓑笠翁。鑑湖一曲荷花浦。君不歸來花有語。舊宅應添竹幾竿。到家不覺秋如許。十年雪裏看淮南。聚米能作淮南山。籌邊妙處須急吐。政自不容修竹閒。人道長江無六月。日光正射青蘆葉。何以贈君濯炎熱。雪卽是詩詩是雪。

烏夜啼

老烏棲棲飛且號。晨來枝上啄楮桃。啄桃已空楮葉死。猶啄枯枝覓蟲蟻。老烏賦分何其貧。未啼已被鄰公曠。吁嗟老烏不自知。牆頭屋上紛成羣。吳中貴遊重鸚鵡。千金遠致能言語。花底紅條鄭袖擎。盤中碧果秦宮取。天生靈物得人憐。過者須來鸚鵡邊。老烏事事無足錄。人間猶傳夜啼曲。

余居茗溪上。與白石洞天爲鄰。潘德久字予曰白石道人。且以詩見畀。其詞曰。人間官爵以樗蒲。采到枯松亦大夫。白石道人新拜號。斷無繳駁任稱呼。予以長句報贖。

南山仙人何所食。夜夜山中煮白石。世人喚作白石仙。一生費齒不費錢。仙人食罷腹便便。七十二峰生肺肝。眞祖只在南山南。我欲從之不憚遠。無方煮石何由軟。佳名錫我何敢辭。但愁自此長苦飢。囊中只有轉庵詩。便當掬水三嚙之。轉庵。德久。白號云。

丁巳七月望湖上書事

白天碎碎如拆繭。黑天昧昧如陳辛。白黑破處青天出。海月飛來光尚溼。是月○祠堂本太史奏月蝕。三家各自矜算術。或云七分或食既。或云食晝不在夕。上令御史登吳山下。視海門監月出。年來曆失無人修。三家之說誰爲優。乍如破鏡光炯炯。漸若小兒初食餅。時方下令嚴禁銅。破鏡何爲來海東。天邊有餅不可食。聞說飢民滿淮北。是鏡是餅且勿論。須臾還我黃金盆。金盆當空四山靜。平波倒浸雲天影。下連八表共此光。上接銀河通一冷。御史歸家太史眠。人間不聞鐘鼓傳。白石道人呼釣船。一瓢欲酌湖中天。荷葉擺頭君睡去。西風急送敲窗句。

送陳敬甫

十年所聞溢吾耳。去年誦君書一紙。古人三語得奇士。況此磊落數百字。相逢千巖萬壑裏。有客如君請兄事。才高自古人所忌。論高不信○祠堂本反驚世。好詩取客如券契。我無三者猶至是。如君之貧不可避。如君之貧不可避。呼舟徑度寒潮外。

生雲軒

在山長與雲同齋。出山憶雲雲不來。千金買得太湖石。數峰相對寒崔嵬。朝來忽覺青苔溼。黶黶如炊石間出。白雲何處不相逢。卻怪年年枉相憶。王郎胸中橫一邱。在山出山雲與遊。更呼白石老居士。來倚雲根吟七字。

送項平甫倅池陽

項君聲名天宇窄。與君俱是荆湖客。向來相聞不相值。長安城中乃相識。論文要得文中天。邯鄲學步終不然。如君筆墨與性合。妙處特過蘇李前。我如切切秋蟲語。自謂平生用心苦。神凝或與元氣接。屢舉似君君亦許。西湖一曲古牆陰。清坐論詩夜向深。見謂人間有公等。不知來者不如今。乾坤雖大知者少。君不見古人拙處今人巧。我徂山林口挂壁。如君合救狂瀾倒。石渠春水綠泱泱。閣下無人白日長。萬里江湖入歸夢。子雲不願校書郎。九華山色梅根渡。半日風帆卽秋浦。六條察吏安用許。幸有千巖作詩侶。

書乞米帖後

銀鉤鐵畫太師字。從人乞米亦可憐。五倉空虛胃神哭。竟日悄悄無炊煙。仙人留書說服氣。道士辟穀期引年。人生不食浪自苦。獨不見子桑鼓琴十日雨。

契丹歌

都下聞蕭總管白
語其風土如此。

契丹家住雲沙中。若車如水馬若龍。春來草色一萬里。芍藥牡丹相間紅。大胡牽車小胡舞。彈胡琵琶調胡女。一春浪蕩不歸家。自有穹廬障風雨。平沙軟草天鵝肥。胡兒千騎曉打圍。卓旗低昂圍漸急。驚作羊角凌空飛。海東健鶴健如許。韞上風生看一舉。萬里追奔未可知。劃見紛紛落毛羽。平章俊味天下無。年年海上驅羣胡。一鵝先得金百兩。天使走走送賢王。盧天鵝之飛鐵爲翼。射生小兒空看得。腹中驚怪有新薑。元是江南經宿食。

禽言如曰哥哥

君不見蒼溪西南石鼓山。烏如鸚鵡啼其間。一人相傳是阿弟。千呼萬喚去復還。身爲獨雁失儔侶。所愧
鶴鴝圖急難。繞林哀哀訴明月。夜闌月落聲漸咽。天地闊遠兄不聞。蒼厓下淚山竹裂。豈無鴉舅與鴉姑。
人各有心非友于。陟岡四顧空歔歔。君不見江南望夫誰家子。登山化石不得語。

次韻誠齋送僕往見石湖長句

客來讀賦作雌蜺。平生未聞衡說詩。省中詩人官事了。狎鷗入夢心無機。韻高落落懸清月。鏗鏘妙語春
冰裂。一自長安識子雲。三歎郢中無白雪。范公蕭爽想出塵。有客如此渠不貧。堂堂五字作城守。平章勁
敵君在口。二公句法妙萬夫。西來囊中藏魯瑣。只今擊節烏棲曲。不愧當年賀鑑湖。

送姜堯章謁石湖先生

楊萬里 廷秀

釣璜英氣橫白蜺。咳唾珠玉皆新詩。江山愁訴鴛爲泣。鬼神露索天洩機。彭蠡波心弄明月。詩星入腸
肺肝裂。吐作春風百種花。吹散瀕湖數峰雪。青溪布韞軟紅塵。千詩只博一字貧。吾友彝陵蕭太守。逢
人說項不離口。袖詩東來謁老夫。慚無高價索瑤瑤。翻然欲買松江艇。逕去蘇州參石湖。

白石道人詩集卷下

五言律詩

題華亭錢參園池

花裏藏仙宅。簾邊駐客舟。浦涵滄海潤。雲接洞庭秋。草木山山秀。闌干處處幽。機雲韜世業。暇日此夷猶。

同朴翁登臥龍山

龍尾回平野。簷牙出翠微。望山憐綠遠。坐樹覺春歸。草合平吳路。鷗忘霸越磯。午涼松影亂。白羽對禪衣。

坐上和約齋

句入冰輪冷。愁因玉宇開。可無如此客。猶恨不能杯。好句長城立。寒鴉結陣來。筌篥莫停手。拚卻斷腸回。

出北關

吳兒臨水宅。四面見行舟。蒲葉侵鷺頂。楊枝蘸馬頭。年年人去國。夜夜月窺樓。傳語城中客。功名半是愁。

答沈器之二首

江漢乘流客。乾坤不繫舟。玉琴虛素月。金劍落清秋。野鹿知隨草。飢鷹故上鞦。風流大隄曲。一唱使人愁。

涉遠身良苦。登高望欲迷。試吟青玉案。不是白銅鞮。露下秋蟲怨。風高北馬嘶。槎頭有新味。人在太湖西。

悼石湖三首

身退詩仍健。官高病已侵。江山平日眼。花鳥暮年心。九轉終無助。三高竟欲尋。尙留巾墊角。胡虜有知音。
未作龍蛇夢。驚聞露電身。百年無此老。千首屬何人。安得公長健。那知事轉新。酸風憂國淚。高塚臥麒麟。
未定情鍾痛。何堪更悼亡。遺書知伏枕。來弔只空堂。雪裏評詩句。梅邊按樂章。沈思酒杯落。天闊意一作茫茫。

七言律詩

送朝天續集歸誠齋時在金陵

翰墨場中老斲輪。真能一筆掃千軍。年年花月無閒日。處處山川怕見君。箭在的中非爾力。風行水上自成文。先生只可三千首。回施祠堂本作施江東日暮雲。

寄上張參政

姑蘇臺下梅花樹。應爲調羹故早開。燕寢休誇香霧重。鴛行卻望袞衣來。前時甲第仍垂柳。今度沙隄已種槐。應念無枝夜飛鵲。月寒風勁羽毛摧。

京口留別張思順

伯勞飛燕若爲忙。還憶東齋夜共牀。別後無書非棄我。春前會面卻他鄉。連宵爲說經憂患。異日相逢各老蒼。更欲少留天不許。曉風吹艇入垂楊。

次朴翁遊蘭亭韻

亞字橋亭面面風。六人同坐樹陰中。松交歸路如留客。石礙流杯故惱公。山色最憐秦望綠。野花只作晉時紅。夕陽啼鳥人將散。俯仰興懷自昔同。右軍祠堂有杜鵑花兩株。極照灼。

次韻胡仲方因楊伯子見寄

此去廬陵定幾程。向來印○舊鈔本作節杖未經行。懸知征棹雲邊集。大有吟情雪裏生。楚渡食萍應甚美。舜祠吹玉直能清。二君即日青冥上。惟我春山帶雨耕。仲方得萍嚙宰。伯子得營道倅。

賀張肖翁參政

太乙圖書客屢談。已知上相出淮南。銀臺日月非虛過。金鼎功名得細參。從此與人爲雨露。應憐有客臥雲嵐。明朝起爲蒼生賀。旋著藤冠紫竹簪。

陳君玉以小集見歸。用余還誠齋朝天續集韻作七字。夔報貺。

筆陣無功汗左輪。而今老去不能軍。水邊白鳥閒於我。窗外梅花疑是君。欲向江湖行此語。可無朋友託斯文。新篇大是相料理。因憶西山揚子雲。

寄田郎

楚楚田郎亦大奇。少年風味我曾知。春城寒食誰相伴。夜月梨花有所思。翦燭屢呼金鑿落。倚窗閒品玉參差。含情不礙逢人說。鸚鵡能歌自作詞。

送王德和提舉淮東

京塵吹帽汗淋漓。相見頻年只道歸。省裏移文那得了。家邊持節未爲非。煮乾碧海知誰用。割盡黃雲尙告饑。可不爲根本計。秋風還是鴈南飛。

寄時甫

遲君日日數歸程。到得君歸我已行。一路好山思共看。半年有酒不同傾。吾儕正坐清貧累。各自而今白髮生。人物渺然須強飯。天工應不負才名。

送李萬頃

猛相思裏得君來。正喜歡時卻便回。別路恐無青柳折。到家應有小桃開。起居五馬兼堂上。問信千巖及阿灰。張韓姪張曙小字阿灰。兒女癡頑夫婦健。漂零何日共尊罍。

次韻千巖雜謠

中散平生七不堪。鳳塵時時伴燕譚。道士有神傳火棗。故人無字入雲藍。雨涼竹葉宜三酌。日落荷花倚半酣。極欲扁舟南蕩去。冷鷗輕燕略相諳。

寄上鄭郎中

梅根東望九華雲。中有風流衣繡人。名下一生勞夢想。尊前數語倍情親。節旄在道催歸漢。花鳥留君且作春。見說祥風挾時雨。故園松菊亦精神。

送左眞州還長沙

吳兒牽挽醉蓴鱸。今日西歸略自如。別路冷雲隨驛馬。望鄉喬木記吾廬。湘中花月偏憐酒。淮左兒童待擁車。凡我舊遊君更歷。橘洲相見訝無書。

乍涼寄朴翁

前日松間步屣歸。更將荷葉障秋暉。如今城裏拋團扇。應是山中試夾衣。水有秋容蓮漸少。樹含涼氣鳥慵飛。炎天旣懶趨城市。從此尤須戀翠微。

張平甫哀挽

將軍家世出臞儒。合上青雲作計疏。吳下宅成花未種。湖邊地吉草新鉏。空嗟過隙催人世。賴有提孩讀父書。他日石羊芳草路。弟兄來此一沾裾。

五言絕句

同潘德久作明妃詩

明妃未嫁時。滿宮妒蛾眉。一朝辭玉陛。人人淚雙垂。年年心隨雁。日日穹廬中。遙見沙上月。忽憶建章宮。身同漢使來。不同漢使歸。雖爲胡中婦。只著漢家衣。

東堂聯句

金風涼夜深。吹我蕭蕭髮。趙雍和仲起折丹桂枝。驚落花上月。白石

輿和甫時甫分題畫卷。夔得剡溪圖。

枯槎啁乾鵲。交臂失夫君。柰此一尊酒。憑高空水雲。

六言絕句

金神夜獵圖二首

夜半金神羽獵。奔走山川百靈。雲氣旂旗來下。颯然已入青冥。
後宮嬋娟玉女。自輕八尺飛龍。兩兩鳴鞭爭導。綠雲斜墜春風。

次韻鴛鴦梅二首

晴日小溪沙暖。春夢憐渠頸交。只怕笛聲驚散。費人月咏風嘲。
漠漠江南煙雨。于飛似報初春。折過女郎山下。料應愁殺佳人。

馬上值牧兒

馬背何如牛背。短衣落日空山。只麼身歸盤谷。未須名滿人間。

七言絕句

過湘陰寄千巖

渺渺臨風思美人。荻花楓葉帶離聲。夜深吹笛移船去。三十六灣秋月明。

雁圖

萬里晴沙夕照西。此心唯有斷雲知。年年數盡秋風字。想見江南搖落時。

除夜自石湖歸苕溪

此詩錄寄誠齋。得報云。所寄十詩。有裁雲縫霧之妙思。敲金戛玉之奇聲。

有

細草穿沙雪半銷。吳宮煙冷水迢迢。梅花竹裏無人見。一夜吹香過石橋。美人臺上昔歡娛。今日空臺望五湖。殘雪未融青草死。苦無麋鹿過姑蘇。

黃帽傳呼睡不成。投篙細細激

一作擊

流冰。分明舊泊江南岸。舟尾春風颭客燈。

千門列炬散林鴉。兒女相思未到家。應是不眠非守歲。小窗春意入燈花。

三生定是陸天隨。

只○祠堂本作又。

向吳松作客歸。已拚新年舟上過。情人和雪洗征衣。

沙尾風迴一棹寒。椒花今夕不登盤。百年草草都如此。自琢春詞翦燭看。

箬澤茫茫雁影微。玉峰重疊護雲衣。長橋寂寞春寒夜。只有詩人一舸歸。

桑間篝火卻宜蠶。風土相傳我未諳。但得明年少行役。自裁白紵作春衫。

少小知名翰墨場。十年心事只淒涼。舊時曾作梅花賦。研墨於今亦自香。

環玦隨波冷未銷。古苔留雪臥牆腰。誰家玉笛吹春怨。看

○舊鈔本作照。

見鷺黃上柳條。

臨安旅邸答蘇虞叟

垂楊風雨小樓寒。宋玉秋詞不忍看。萬里青山無處隱。可憐投老客長安。

姑蘇懷古

夜暗歸雲繞柁牙。江涵星影鷺眠沙。行人悵望蘇臺柳。曾與吳王掃落花。

次韻德久

籬落青青花倒垂。避人黃鳥雨中飛。西郊寂寞無車馬。時有溪童買菜歸。

次石湖書扇韻

橋西一曲水通村。岸閣浮萍綠有痕。家住石湖人不到。藕花多處別開門。

竹友爲徐南卿作

髮已星星帶已寬。徐卿猶自客長安。家山竹好無由看。漫種庭前○祠堂本一兩竿。

世路蒼黃○祠堂本作茫總是愁。暮年須得小優游。如今漸覺知心少。賸種青青伴白頭。

壽朴翁

與師同月不同年。歸墨歸儒各自緣。思得山中無壽酒。但攜茶到菊花前。

湖上寓居雜咏

荷葉披披一浦涼。青蘆奕奕夜吟商。平生最識江湖味。聽得秋聲憶故鄉。

湖上風恬月澹時。臥看雲影入玻璃。輕舟忽向窗邊過。搖動青蘆一兩枝。

秋風低結亂山愁。千頃銀波凝○祠堂本作凝不流。隄畔畫船隄上馬。綠楊風裏兩悠悠。

處處虛堂望眼寬。荷花荷葉過闌干。遊人去後無歌○藝鈔本作簫鼓。白水青山生晚寒。

輦路垂楊兩行栽。苑門秋水欲平階。朝朝南望宮雲起。白鳥一雙山下來。微波衝得綠萍開。數點青青黏石階。綠葑自來還自去。來時須載白鷗來。布衣何用揖王公。歸向蘆根濯軟紅。自解此心無一事。小魚跳出綠萍中。囊封萬字總空言。露滴桐枝欲斷絃。時事悠悠吾亦嬾。臥看秋水浸山煙。苑牆曲曲柳冥冥。人靜山空見一燈。荷葉似雲香不斷。小船搖曳入西陵。處士風流不並時。移家相近若依依。夜涼一舸孤山下。林黑草深螢火飛。臥榻看山綠漲天。角門長泊釣魚船。而今漸欲拋塵事。未了菟裘一悵然。鉤窗不忍見南山。下有三雛骨未寒。惆悵古今同此味。二陵風雨晉師還。柳下軒窗枕水開。畫船忽載故人來。與君同過西城路。卻指煙波獨自回。指點移舟著柳隄。美人相顧復相攜。上橋更覺秋香重。花在西陵小苑西。

平甫見招不欲往

老去無心聽管絃。病來杯酒不相便。人生難得秋前雨。乞我虛堂自在眠。樓閣萬重秋雨裏。峰巒四合暮湖邊。鳳城今夕涼如水。多少人家試管絃。

三高祠

越國竊來頭已白。洛京歸後夢猶驚。沈思只羨天隨子。蓑笠寒江過一生。

過桐廬

橫看山色仰看雲。十幅風帆不藉人。記取合江江畔樹。他年此處好垂綸。
登烏石寺觀張魏公劉安成岳武穆留題。劉云侍兒意真奉命題記。
諸老凋零極可哀。尙留名字壓崖嵬。劉郎可是疏文墨。幾點胭脂汗綠苔。

過垂虹

自作新詞韻最嬌。小紅低唱我吹簫。曲終過盡松陵路。回首煙波十四橋。

訪費山人

稻叢茁茁欲齊肩。楊柳傲傲不蔽蟬。忽憶石頭橋。○舊鈔本作城。祠堂本同。下路。槿花斜壓釣魚船。

牛渚

牛渚磯邊渺渺秋。笛聲吹月下中流。西風不識張京兆。畫得蛾眉如許愁。

武康丞宅同朴翁詠牽牛

青花綠葉上疏籬。別有長條竹尾垂。老覺澹妝差有味。滿身秋露立多時。

朴公悼牽牛甚奇余亦作

不見青青繞竹生。西風籬落抱枯藤。道人一任空花過。愁殺山陰覓句僧。

過德清

木末誰家縹緲亭。畫堂臨水更虛明。經過此處無相識。塔下秋雲爲我生。
溪上佳人看客舟。舟中行客思悠悠。煙波漸遠橋東去。猶見闌干一點愁。

項里

○舊鈔本有
苔梅二字。

項里。項王之里也。在山陰西南二十餘里。地多楊梅苔梅。皆妙天下。王性之賦項里楊梅云。良
今枝頭萬顆紅。猶似咸陽三月火。予近得苔梅一株。古怪特甚。爲作七言。

舊國婆娑幾樹梅。將軍逐鹿未歸來。江東父老空相憶。枝上年年長綠苔。

雪中六解

塞草汀雲護玉鞍。連天花落路漫漫。如今卻憶當時健。下馬題詩不怕寒。
黃鶴磯邊晚渡時。柳花風急片帆飛。一聲長笛魚龍舞。白浪如山不肯歸。
萬馬行空轉屋簷。高寒屢索酒杯添。故人家住吳山上。借得西湖自捲簾。
曾泛扁舟訪石湖。恍然坐我范寬圖。天寒遠挂一行雁。三十六峰生玉壺。
萬壑千巖一樣寒。城中別有玉龍蟠。舊人乘興扁舟處。○舊鈔本
作去。今日詩仙○舊鈔本
作成。戴笠着。
沈香火裏笙簫合。煖玉鞍邊雉兔空。辦得煎茶有驕色。先生只合作詩窮。

越中士女春遊

秦山越樹兩依依。閒倚闌干看落暉。楊柳梢頭春又暗。玉簫聲裏夜遊歸。

白石道人詩集

卷下

二五

送范仲訥往合肥三首

壯志只便鞍馬上。客夢長在江淮間。誰能辛苦運河裏。夜與商人爭往還。
我家曾住赤蘭橋。鄰里相過不寂寥。君若到時秋已半。西風門巷柳蕭蕭。
小簾燈火屢題詩。回首青山失後期。未老劉郎定重到。煩君說與故人知。

下菰城

人家多在竹籬中。楊柳疏疏尙帶風。記得下菰城下路。白雲依舊兩三峰。
平甫放三十二詞堂鷗於吳松。余不及與盟。

橋下松陵綠浪橫。來遲不與白鷗盟。知君久對青山立。飛盡梨花好句成。

蕭山

歸心已逐晚雲輕。又見越中長短亭。十里水邊山下路。桃花無數麥青青。
戊午春帖子

晴窗日夜擬雕蟲。惆悵明時不易逢。二十五絃人不識。澹黃楊柳舞春風。

偶題

阿八宮中酒未醒。天風吹髮夜泠泠。歸來只怕扶桑晚。赤腳橫騎太乙鯨。

陳日華侍兒讀書

繹句尋章久未休。花房日晏不梳頭。誰教郎主能多事。乞與冥冥千古愁。

女郎山

漢陽縣西二十里

不見郢中能賦客。可憐負此女郎山。冰魂寂寞無歸處。獨宿鴛鴦沙水寒。

釣雪亭

闌干風冷雪漫漫。惆悵無人把釣竿。時有官船橋畔過。白鷗飛去落前灘。

綠萼梅

黃雲承轡知何處。招得冰魂付北枝。金谷樓高愁欲墮。斷腸誰把玉龍吹。

次韻武伯

楊柳風微約暮寒。野禽容與只波閒。道人心性如天馬。欲擺青絲十二閑。

觀燈口號十首

世間形象盡成燈。烘火旋紗巧思生。列肆又多看不遍。○舊鈔本作偏。行○祠堂本人一一把燈行。

市樓歌吹太喧譁。燈若連珠照萬家。太守令嚴君莫舞。遊人空帶玉梅花。
遊人總戴孟家蟬。爭託星毬萬眼圓。鬧裏傳呼大官過。後車多少盡嬋娟。
花帽籠頭幾歲兒。女兒學著內人衣。燈前月下無歸路。不到天明亦不歸。
好燈須買不論錢。別有琉璃價百千。都下貴人多預賞。買時長在一陽前。

珠絡琉璃到地垂。鳳頭銜帶玉交枝。君王不賞無人進。天竺堂深夜雨時。
紛紛鐵馬小回旋。幻出曹公大戰年。若使宗雉知□事。不教兒女戲燈前。
貴客鉤簾看御街。帝中珍品一時來。簾前花架無行路。不得金錢不肯回。
修內司人編戲鼓。輦官營裏獨燒燈。春風到處皆君賜。金柳絲絲滿鳳城。
正好嬉遊天作魔。翠翬無奈雨沾何。御街暗裏無燈火。處處但聞樓上歌。

陪張平甫遊禹廟

鏡裏山林綠到天。春風只在禹祠前。一聲何處提壺鳥。猛省紅塵二十年。

寄兪子二首

此郎都無子弟氣。夜對黃妳籠青燈。君今落腳墮鳶外。欲往從之歎未能。
郎罷才名今白髮。佐州亦復坐窮邊。甚欲出手相料理。東南風高難寄箋。

白石道人集外詩

燈詞 見武林舊事

南陌東城盡舞兒。畫金刺繡滿羅衣。也知愛惜春遊夜。舞落銀蟾不肯歸。
燈已闌珊。月氣寒。舞兒往往夜深還。只因不盡婆娑意。更向階心弄影看。
沙河雲合無行處。惆悵來遊路已迷。卻入靜坊燈火空。門門相似列蛾眉。
遊人歸後天街靜。坊陌人家未閉門。簾裏垂燈照尊俎。坐中嬉笑覺春溫。

春詞 見武林舊事

六軍文武浩如雲。花簇頭冠樣樣新。惟有至尊渾不戴。盡將春色賜羣臣。
萬數簪花滿御街。聖人先自景靈回。不知後面花多少。但見紅雲冉冉來。

同朴翁過淨林廣福院 見咸淳臨安志

四人松下共盤桓。筆硯花壺石上安。今日興懷同此味。老仙留字在孱顏。

嘉泰壬戌上元日訪全老於淨林廣福院觀沈傅師碑降茂宗畫贈詩 見咸淳臨安志

深衣跨羸驂。杳杳春山路。入寺君未知。閒看移桂樹。

沈碑含秀潤。隆畫出神奇。道人那得此。老子乃耽之。

白石道人詩集 集外詩

龍井 見咸淳臨安志。

年時六月海揚塵。遙見青山起白雲。聞有高僧來誦咒。巖前拋琰問龍君。

自題畫像 見硯北雜誌。

鶴氅如煙羽扇風。寄情芳草綠陰中。黑頭辦了人間事。來看凌霜數點紅。

句

小山不能雲。大山半爲天。見歸田詩話。

屋角紅梅樹。花前白石生。見愛日齋叢鈔。

附錄諸賢酬贈詩

進退格寄張功甫姜堯章

楊萬里廷秀

尤蕭范陸四詩翁。此後誰當第一功。新拜南湖爲上將。更牽白石作先鋒。可憐公等俱癡絕。不見詞人到老窮。謝遣管城儂已晚。酒泉端欲乞移封。

題堯章新成草堂

周文璞晉仙

早將心事付漁樵。若被幽人苦見招。多種竹將挑筍喫。旋栽松待斫柴燒。壁間古畫身都碎。架上枯琴尾半焦。猶有住山窮活計。仙經盈卷一村瓢。

姜堯章金塗佛塔歌

周文璞晉仙

白石招我入書齋。使我速禮金塗塔。我疑此塔非世有。白石云是錢王禁中物。上作如來捨身相。飢鷹餓虎紛相向。拈起靈山受記時。龍天帝釋應惆悵。形模遠自流沙至。鑄出今回更精緻。錢王納土歸京師。流落多在西湖寺。錢王本是英雄人。白蓮花現國主身。蛇鄉虎落狗腳脰。何如錦袍玉帶稱功臣。天封垢開卽退聽。兩浙不聞笳鼓競。歸來佛子作護持。太師尙父尙書令。一枚傳到白石生。生今但有能詩聲。同袍秦外銛師兄。哦詩禮塔作佛事。同喫地鑪山芋羹。何曾薰陸綺牀供。但見相輪銅綠明。哦詩禮塔猶未畢。蘆葉低飛山雨溼。

弔堯章

周文璞晉仙

相逢蕭寺已纍然。自詠離騷講太玄。極目舊遊惟白石。傷心孤塚只蒼煙。兒從外舍收殘稿。客向空山泣斷猿。帝所修文與張樂。魂兮應是到鈞天。

和堯章九日送菊二首

王炎晦叔

對花懶舉玉東西。孤負金錢滿綠枝。短髻不堪重落帽。枯腸何可強搜詩。花品若將人品較。此花風味似吾儒。秋英餐罷含清思。曾有離騷續筆無。

題堯章舊遊詩卷

王炎晦叔

出郭栽花涉小園。歸調琴譜輯詩編。少年豪健今孳斂。休羨騎鯨李謫仙。臘中得雪快晴成。古風呈堯章鉛老。

王炎晦叔

蒼頭熟睡喚不應。光射紙窗疑月明。更籌可數夜方半。杙上一雞先誤鳴。曉起飛花堆戶外。幻出人間無色界。九街車馬不知寒。蹴蹋銀杯翻縞帶。杲杲日升東海東。須臾光彩蒸霞紅。不憂桂玉頓增價。人在沖融和氣中。貝闕珠宮五雲際。遙知天上龍顏喜。麥畦白白覆青青。農事年來定豐美。

清明日訪白石不值

葛天民無懷

花叢懸燈柳拂簷。老懷那得似錫甜。畫船已載先生去。燕子無人白入簾。

重訪白石

葛天民無懷

長安惟白石，與我最相關。每到難逢面，翻思懶下山。欲歸愁路永，小住待君還。盡日看幽桂，無人似我閒。

六月一日與堯章泛湖

葛天民 無懷

六月西湖帶雨山，小舟終日傍鷗閒。風煙如許關情甚，賓主相推下語難。幾點送君歸大雅，一涼今夜滿長安。江湖遠思知多少，歸去風前各倚闌。

因過田倅，坐間得姜堯章所贈詩卷，以七字爲報。

張 鋌 功甫

京塵輿馬競揚埃，何礙騷人獨往回。我住水邊奚自識，詩如雲外寄將來。一從風裏攜歸看，屢向松亭靜展開。應是冰清逢玉潤，只因佳句不因媒。

千巖居士蕭東夫，
卽姜婦翁也。

諸賢酬贈詩詞補遺

番陽姜堯章以詩寄贈。用次原韻五首。會之。

陳造唐卿

徐郎巢已焚。庭竹亦無在。太倉五升米。舉室枵腹待。云何鮭菜供。日與長翁對。世有作金術。閭里頗猜怪。邱嫂翦髻餘。舊質疊新債。

詩傳侯王家。翰墨到省寺。姜郎粲然文。羣飛見孔翠。論交辱見子。盧馬果同異。念君聚百指。一飽仰臺餽。我亦多病過。忍口嚴酒戒。終勝柳州吐水賦。解崇。

壯年志在行。皇皇困無君。老矣此念灰。去住如閒雲。詩壇二三子。一見勝百聞。徐郎吳下業。絢麗工語言。滔天自濫觴。昔人求其源。隱几有妙領。未覺市聲喧。

自甘謝祖風。屑屑埽一室。準擬高史來。函丈置三席。聲名絕輩行。文字追古昔。黃白馬上郎。覲面不相挹。

眼青節食事。日耐飢雷吼。茲幸陪衆後。酒卮甫到口。不離寂莫濱。徑造無何有。問津歸有期。尚許尋盟否。

次堯章餞南卿韻二首

陳造唐卿

姜郎未仕不求田。倚賴生涯九萬箋。捆載珠璣肯分我。北關當有合肥船。

風調心期契鑰同。誰教社燕辟秋鴻。暮年孤陋仍漂泊。可得斯人慰眼中。

三部樂

賦姜石帚漁隱

吳文英君特

江鷓初飛。蕩萬里素雲。際空如沐。詠情吟思。不在秦箏金屋。夜潮上。明月蘆花。傍釣簑夢遠。句清敲玉。翠罌汲曉。欸乃一聲秋曲。片篷障雨。乘風半竿渭水。伴鷺汀幽宿。那知慳袍挾錦。低簾籠燭。鼓春波。載花萬斛。帆鬣轉。銀河可掬。風定浪息。蒼茫外。天浸寒綠。

三姝媚

姜石帚館水磨方氏。會飲總宜。卽事寄毛荷塘。

吳文英君特

酣春清鏡裏。照清波明眸。暮雲愁思。半綠垂絲。正楚腰纖瘦。舞衣初試。燕客漂零。煙樹冷。青驄曾繫。畫館朱橋。還把青尊。慰春顛頰。離苑幽芳深閉。恨淺薄東風。褪香銷膩。綵扇翻歌。最賦情偏在。笑紅顰翠。暗拍闌干。看散盡斜陽舫市。付與嬌鸞。金衣清曉。花深未起。此詞較他作多二字。嬌鸞二字疑衍。

解連環

留別姜石帚

吳文英君特

思和雲結。斷江樓望睫。雁飛無極。正岸柳衰不堪攀。忍持贈故人。送秋行色。歲晚來時。暗香亂。石橋南北。又長亭暮雪。點點泪痕。總成相憶。杯前寸陰似擲。幾酬花唱月。連夜浮白。省聽風聽雨。笙簫向別。

枕倦醒。絮颺空碧。片葉愁紅。趁一舸、西風潮汐。歎滄波路長。夢短甚時到得。

拜星月慢

姜石帚以盆蓮數十置中庭。宴客其中。

吳文英君特

絳雪生涼。碧霞籠夜。小立中庭蕪地。昨夢西湖。老扁舟身世。歎遊蕩。暫賞吟花酌露尊俎。冷玉紅香。疊洗眼。眩意迷。古陶淵十里。翠參差。澹月平芳砌。甄花混。小浪魚鱗起。霧盡淺障青羅。洗湘娥春膩。蕩蘭煙。麝馥濃侵酒。吹不散。繡屋重門閉。又怕便。綠減西風。泣秋檠燭外。

齊天樂

贈姜石帚

吳文英君特

餘香繼潤鸞綃汗。秋風夜來先起。霧鎖林深。藍浮野闊。一笛漁篴瀨外。紅塵萬里。就中決銀河。冷涵空翠。岸背沙平。水楊陰下晚初艤。桃溪人住最久。浪吟誰得到。蘭蕙疏綺。研色寒雲。籤聲亂葉。斬竹簾紋如水。笙歌醉裏。步明月丁東。靜傳環佩。更展芳塘。種花招燕子。

惜紅衣

予從姜石帚遊苕霅間。三十五年矣。重來傷今感昔。聊以詠懷。

吳文英君特

蠶老秋絲。蘋愁暮雪。鬢那不自。倒柳移栽。如今暗碧。烏衣細語傷伴。惹茸紅。曾約南陌。前度劉郎。尋流花蹤迹。朱樓水側。雪面波光。汀蓮沁顏色。當時醉近繡箔。夜吟寂。三十六磯重到。清夢冷雲南北。

買釣舟溪上。應有煙蓑相識。

暗香疏影

猶記己卯庚辰之間。初識堯章于維揚。己丑嘉興再會。自此契闊。開堯章死西湖。嘗助諸丈爲殯之。今又不知幾年矣。自昭忽錄示堯章暗香疏影二詞。因信手酬酢。并賡潘德久之詞云。

吳潛 毅夫

雪來比色對澹然一笑。休喧笙笛。莫怪廣平鐵石心腸爲伊折。偏是三花兩葉。消萬古才人騷筆。尙記得醉臥東園。天幕地爲席。回首往事寂。正雨暗霧昏。萬種愁積。錦江路。悄媒聘音沈。兩空憶。風是茅檐竹戶。難指望。凌煙金碧。顛顛了。羌管裏怨誰始得。右暗香。

佳人步玉待月來弄影。天挂參宿。冷透屏幃。清入肌膚。風敲又聽檐竹。前村不管深雪閉。猶自繞枝南枝北。笨平生此段幽奇。占壓百花會獨。閒想羅浮舊恨。有人正醉裏。珠翠蛾綠。夢斷魂驚。幾許淒涼。卻是千林梅屋。雞聲野渡溪橋滑。又角引戍樓悲曲。怎得知清足亭邊。自在杖藜巾幅。梅聖俞詩云。十分清意足。余別墅有

梅亭。扁曰清足。
右疏影。